



Igl project «Nandro-Solar» duess furneir 2,5 gedas tanta energieia scu chegl tg'igl cumegn da Surses dovra an en onn.

VISUALISAZIUN EWZ

## «Igl tempo è brutal»

Egn digls gronds parcs solars dalla Svizra è planiso ainten la Val Nandro sur Savognin. Marde seira on l'Ovra electrica digl martgea da Turitg (EWZ) – la realisatoura digl project – ed igl cumegn da Surses infurmo la populaziun ainten la Sala Grava a Savognin. Igl tenor da chella seira: angal pacas resalvas anvers igl project, ma igl grond tempo da stueir decider disturba egn u l'oter.

SANDRO BUCHLI/FMR

Er sch'igl apero tg'è nia ampurmess siva la seira d'infurmaziun è mantgea la fegn finala – igl tenor dalla populaziun da Surses anvers igl mega-project da solar dad ena grondezza da prest 70 hectaras è sto pitost positiv cun angal enqual resalvas ainten Sala Grava. Ma egn siva l'oter.

Marde seira allas otg ainten la Sala Grava: Igl cumegn da Surses e l'Ovra electrica digl martgea da Turitg (EWZ) on anvido ad ena seira d'infurmaziun davart igl grond project d'energeia ainten la Val Nandro. E la gliout è neida an rotschas. Radond 300 persungas – schi bleras scu darar tar occurrenzas publicas an Surses – on lia tadlar igls detagls, en pèr soptgas on perfign anc stuaia neir organisadas per tgi tots vegian plaz.

### Berna dictescha il tempo

Sch'igl project da 100–150 milliuns francs duess survagner subvenziuns dalla Confederaziun, stò tot eir fitg svelto. Chegl on accentuo tot igls referents ed experts d'energeia tg'èn stos davant la sala plagna. «Nous vagn survagnia dicto da Berna en tempo ot», ò detg *Phillippe Heinzer* dallas ovras e venavant: «Igl project Nandro-Solar è ena gronda nomra da calzers, per nous e per igl cumegn.» Raschung è tgi la Confederaziun paia angal, schi 10% dalla produzzion dalla ovra solara vo an funcziun gio all'antschatta digl onn 2025.

Uscheia ò la populaziun da decider gio dalla proxima radunanza communal, igls 11 da december 2023, schi els lessan dar la

lubientscha per egn digls pi gronds parcs solars an Svizra.

«Igl tempo è brutal», ò detg *Gian Jegher*, igl inschignier tgi accumpogna igl project dalla EWZ tgi ò explitgia detagls scu tgi igl parc solar otalpin vigna biagia. Tant è cler: i dovra svelto las lubientschas, e siva dovrigl svelto camiuns, e helicopters e cranas e panels per biagier igl implant tgi duess produtgier 2,5 gedas tanta energieia scu chegl tgi igl cumegn da Surses dovra an en onn.

### Thomann e Luzio cun votums

Ena resalva anvers chel tempo ot ò ventilo *Luzi Thomann*, igl president da Turissem Savognin Beiva Alvra SA: «Igl turissem n'è betg cunter la Nandro-Solar, ma igl è ossa da contractar bagn cugl EWZ e da cumbatter per indemnizaziuns schi otas scu pusseblas per igl cumegn.» Igl mument è chellas planisadas cun circa en mez milliun ad onn. «Igl avantatgs per la nosa val ston esser massivs, uscheia tgi nous vagn er ensatge da chegl.» *Luzi Thomann* è sa disturbo, tgi igl cumegn stoptga decider gio igls 11 da december davart igl project: «Igl tempo ot dicto n'è betg bung per far bungas contractivas. Percheigl lagn nous stgaffier taimp e spustar igl termin dalla votaziun.»

En l'oter tema tgi fatschainta è tgi igl parc solar disfò la bela cuntrada dalla Val Nandro: «Igl turissem è responsabel per radond 70–80% dalla creaziun da valour. Tar nous vign la gliout per galdeir la nateira», ò detg *Fabio Luzio*, deputo aint igl Cunsegl grond. El ò lia saveir, tge influenza tgi chegl vegia sen igl turissem an Surses. Propi savia dar rasposta ad el ò nign digls referents, percheigl tgi ins vegia anfignen

ossa anc betg grondas experientschas cun da chels projects ainten lis turisticas.

### Ovras otalpinas pi productivas

Tgi igl territori da skis anturn Radons è pertutgia n'ò er betg plaschia a tots. Uscheia è per exaimpel nia crititgia tg'ins pudess gio er montar chels panels da solar sen teds da tgesas u segl meir da farmada a Marmorera anstagl ainten la bela Val Nandro. «I vo betg persiva, dad excluder oters projects», ò raspundia *Daniel Bürgler* digl EWZ, «ma la productivdad dad ovras otalpinas è, cunzont igl anvien, blier pi ota.» Per neir liber dad energieas fossilas ed atomaras dovrigl tots dus.

*Andreas Stieger*, igl president dalla corporaziun d'alp e possessoura digl taragn noua tgi igl project niss realiso: «Nous cattagn igl project interessant ed ischan ossa parageas per contractivas cugl cumegn.»

### En apero sen tot chegl tgi spetga

Igl mastral, *Leo Thomann*, tgi vign a bandunar igl sies uffez da mastral sen la fegn digl onn ò alla fegn dalla seira d'infurmaziun angal pudia sincerar da leir far bungas contractivas e dad examinar, sch'igl termin dalla radunanza digl december stoptga neir spusto.

E per turnar tar l'antschatta digl artetgel, per deir uscheia, tigl «apero», tg'è bagn nia ampurmess, ma betg nia furnia – chel n'è betg rivo ainten la Sala Grava, percheigl tg'el è nia amblido. Ma atgnamaintg è l'antiera seira da referats e discussiuns da treis ouras schon sto en apero sen tot chegl tgi spetga igl cumegn e lour abitants.



Grond interess per las explicaziuns digls experts d'energeia e per la posiziun digl cumegn.

FOTO GION NUTEGN STGIER

## ORIGEN FESTIVAL CULTURAL

### Tratg a riva en grond «pesch»

An en rom pitschen ò ena societad illustra do la dretg'ambianza all'occurrenza da benefezi tradiziunala digl Origen Festival Cultural. A pled è neidas ples persungas e mantgea ò er betg la part culturala e culinara. A parteir digl anvien survign l'organisaziun culturala en nov sagond sponsour principal, la Repower.

GION NUTEGN STGIER/FMR

La seira da benefezi digl Origen Festival Cultural aint igl hotel «Waldhaus» a Segl ò gio tradiziun e totga tar ena part laterala digl program cultural. Igl è adegna en antop digls ameis fidevels digl festival da cultura ed er adegna en inscunter prest famigliar. Vetiars vign tgi las famiglias *Kienberger* e *Dietrich* tg'èn hospitants generous porschan gugent tetg a tot igls ameis dad Origen. L'occurrenza da benefezi, cun 140 persungas preschaintas, è neida ambelleida cun cant da *Marian Dijkhuizen* accumpagnada agl clavazign d'*Alena Sojer*. La part culinara è eida bagn a pèr cun cant, musica ed ambianza.

### Collaboraziun dall'ETH cun firmas grischunas

La raspada è neida beneventada da *Giovanni Netzer*, igl intendant digl Festival Cultural Origen e da *Rolf Dietrich* digl hotel «Waldhaus». El ò detg tgi Origen seia an veir senn ena miracla. *Giovanni Netzer* seia la persunga, alla quala i gartegia adegna da realisar ensatge, schizont igl pi impussebel. *Andrea Hämmerle*, igl president dalla fundaziun da promoziun ò detg tgi Origen seia en bung exaimpel per en'organisaziun tgi segna per ena gronda creaziun da valour aint igl Grischun Central ed er per la persistenza duevla.

*Benjamin Dillenburger*, professor d'architectura alla Scola politecnica federala da Turitg, ò preschento igl project dalla tor alva tgi vign realisada agls Mulegns. El ò menziuno da sa legrar cunzont dalla collaboraziun an connex cugl project dalla tor alva digls Mulegns cun interpresas grischunas scu la «Invias» (Zindel SA/Uffer SA) e cugl inschignier *Jürg Conzett* da Coira.



Ainten la sala digl hotel «Waldhaus» a Segl ò scumanzo la seira da benefezi digl Origen Festival Cultural.

FOTO GION NUTEGN STGIER

### Dus interpresas grischunas

La Nova Fundaziun Origen survign a parteir digl anvien tgi stat avant porta en sagond sponsour principal. Chegl è l'interpresa d'energeia «Repower SA» cun sedia principala a Poschiavo. Per la Nova Fundaziun Origen ò *Giovanni Netzer* tratg a riva cun la «Repower SA», en menaschi da 600 ampluias, an veir senn en grond «pesch». En grond maret tgi la «Repower SA» è da nov partenaria da sustign dalla fundaziun ò cunzont *Michael Roth* tg'è commember dalla direzzion dall'interpresa d'energeia. El è en grond promotour d'Origen ed ena persunga cun interess immens per la cultura an general. Ena raschung tgi la «Repower SA» sustigna la Nova Fundaziun Origen è er tgi igl travagl d'energeia grischun s'angascha finanzialmaintg per organizaziuns culturalas. Ultra da chegl ò la firma d'energeia er interess da promover instituziuns culturalas tgi segnan per en svilup economic e turistic ainten las regions.

— FMR  
|